

Mid-Day Dogri News Bulletin, 02nd December 2024

समे — 12:25

<><><><><><>

Parliament Adjournment

बरोधी धड़े आसेआ बक्ख-बक्ख मामलें — जि'आं इक मशहूर कारोबारी समूह खलाफ गुज्जखोरी दे कथित आरोपें ते उत्तर-प्रदेश दे संभल च हिंसा दे मामले गी लेइयै कीते गेदे बरोध-प्रदर्शन ते हंगामे करी अज्ज संसद दे दौनें सदन दे कार्रवाई गी कल दिनै 11 बजे तगर लेई स्थगित कीता गेआ ऐ। लोकसभा च अज्ज जि'आं गै कार्रवाई शुरू होई तां बरोधी धड़े दे सदस्य, सदन दे बिच्चो-बिच्च आई गे ते उनें बक्ख-बक्ख मामलें पर चर्चा दी मंग गी लेइयै नारेबाजी शुरू करी दित्ती। स्पीकर ओम बिरला होरें कम्मकाज चलाने दी कोशश कीती पर कांग्रेस, लेफ्ट ते डीएमके दे सदस्ये हंगामा जारी रखेआ जेहदे चलदे स्पीकर होरें सदन दी कार्रवाई दपैहरी 12 बजे तगर लेई स्थगित करी दित्ती। एहदे परैन्त जिसलै सदन दी बैठक फही लग्गी तां बी बरोधी सदस्ये दा हंगामा जारी रेया जिस करी लोकसभा दी कार्रवाई कल दिनै 11 बजे तगर लेई स्थगित करी दित्ती गई। तोआई राज्यसभा च बी इस्सै किस्मै दी स्थिति बनी दी रेई। सभापति जगदीप धनखड़ होरें बरोधी धड़े दे सांसदे गी गुजारिश कीती जे ओह सदन दी कार्रवाई चलन देन पर ओह अपनी मंग पर अड़े दे रेय जिस करी सदन दी कार्रवाई पैहले दपैहरी 12 बजे तगर ते फही पूरे दिनै लेई स्थगित करी दित्ती गई।

<><><><><><>

India-Plastic Pollution

भारत नै प्लास्टिक प्रदूषण दी रोकथाम ते खास तौर उपपर विकासशील देशें च लगातार ते टिकाउ विकास पर असर बश्कार संतुलन बनाने दा आह्वान कीता ऐ। दक्खन कोरिया दे बुसान च अंतर-सरकारी वार्ता समिति दे 5में खुल्ले इजलास च भारत नै प्लास्टिक प्रदूषण दी चुनौती कन्नै निब्बड़ने दा मुद्दा पुट्टेया। भारत नै आखेआ जे इस समस्या दे हल लेई आपसी विश्वास ते इक-दुए दे हालात गी समझना जरूरी ऐ। भारत नै प्राथमिक प्लास्टिक पॉलिमर दे उत्पादन पर विनियमन दे कुसै बी उपाऽ दा समर्थन करने च अपनी असमर्थता जताई, कीजे एहदे कन्नै सदस्य देशें दे विकास अधिकार प्रभावत होंदे न। भारत नै विकासशील देशें गी माली संसाधन उपलब्ध करोआने लेई मते पक्खें दी शमूलियत आह्ला इक कोष बनाने पर बल दित्ता ऐ।



Prez Disability Awards

राष्ट्रपति द्रौपदी मुर्मू होर कल दिव्यांग लोकें सरबंधी अंतर्राष्ट्री ध्याड़े दे मौके उपपर दिव्यांगें दे सशक्तिकरण लेई राष्ट्री अवार्ड भेंट करडन। इस मौके उपपर कुल 22 लोकें ते 11 संस्थानें गी राष्ट्री अवार्ड कन्नै सम्मानित कीता जाहग। समाजी न्याऽ ते सशक्तिकरण सरबंधी केन्द्री मंत्री डाक्टर वीरेन्द्र कुमार होर इस मौके उपपर दिव्यांग लोकें दे सशक्तिकरण लेई केई सारी कल्याणकारी पैहलकदमिएं दी शुरुआत बी करोआडन।



Jammu-BSF Battalions

सीमा सुरक्षा बल – बीएसएफ नै पाकिस्तान पास्सेआ होने आहली घुसपैठ पर रोक लाने ते खित्ते च हाल दे समें दरान बधै करदी आतंकवादी गतिविधिएं कन्नै निबडने लेई जम्मू संभाग च 2 जहार शा मते कर्मिएं आहली अपनी द'ऊं नमीं बटालियनं दी तैनाती दा कम्म सबूरा करी लैता ऐ। आकाशवाणी दे जम्मू संवाददाता दी रिपोर्ट मूजब, इनें युनिटें गी सांबा जिले सने किश होर इलाकें च पाकिस्तान कन्नै लगदे अंतर्राष्ट्री बन्ने कश तैनात कीता गेआ ऐ। बीएसएफ दिआं एह द'ऊं बटालियनां एहदे शा पैहले ओडीशा च नक्सल-बरोधी अभियानें लेई तैनात हिआं।



JK – Nagaland Day

राजभवन जम्मू आसेआ कल 'एक भारत श्रेष्ठ भारत' दी भावना दे कन्नै नागालैंड दा राज्य स्थापना दिवस मनाया गेआ। आकाशवाणी दे जम्मू संवाददाता दी रिपोर्ट मूजब, इस दरान असम दिवस दा बी जश्न मनाया गेआ ते इस कार्यक्रमै च नागालैंड ते असम दे विद्यार्थिएं, सुरक्षाबलें ते बसनीकें गी विशेष तौर पर साददा दित्ता गेदा हा। अपने संबोधन च लेफ्टिनेंट गवर्नर मनोज सिन्हा होरें नागालैंड ते असम दे लोकें गी मुबारकबाद दित्ती। उनें रानी गाईदिनलियु, पीयाली बरूआ, गोपीनाथ बारदोलाई, कनकलता बरूआ ते होरनें म्हान शख्सियतें गी श्रद्धांजलि अर्पित कीती। एलजी होरें आखेआ जे एह दौने राज्य भारत दी ताकत, सांस्कृतिक विरासत ते आधुनिकता गी दर्शादे न।



CS-DMRR Review

मुख्य सचिव अटल डुल्लु होरें आपदा प्रबंधन, राहत, आबादकारी ते पुर्ननिर्माण मैहकमे दी इक बैठक लाइयै जम्मू-कश्मीर च जारी आपदा प्रबंधन लेई कीते गेदे हीलें दा जायजा लैता। इस मौके पर उनें सरबंघत विभाग उप्पर जोर पाया जे ओह समूलचे प्रदेश च कुदरती क्रोपिएं दी शेंका आहली थाहरें लेई कार्ययोजना अगेत्रे गै तैयार करी रखन। उनें इस सरबंघे च एह हुक्म रसाल कीता जे इस माली ब'रे दे अखीरै तोहड़ी आपात स्थिति च कार्रवाईएं आहला इक केन्द्र स्थापित कीता जा। मुख्य सचिव होरें बक्ख-बक्ख प्हाड़ी इलाकें च स्थित झीलें दा दौरा लाइयै ग्लेशियर आहली ऐकड़ी झीलें करी आई सकने आहले हाड़ें बारै इक शोध कीते जाने दी जरूरतै पर बी जोर पाया। उनें सरबंघत धड़ें दा आह्वान कीता जे ओह राहत सरबंघी गतिविधिएं दरान अपनी भूमिका असरदार ढंगै सिर निभाना जकीनी बनान।



RNU Raising Day

आकाशवाणी दा क्षेत्रीय समाचार एकांश जम्मू औंदी 6 दिसम्बर गी अपना 54मां स्थापना दिवस मनाने जा'रदा ऐ। इस सिलसिले च एकांश केई सारे कार्यक्रमें दा आयोजन करै करदा ऐ। स्थापना दिवस आले रोज 6 दिसम्बर गी बड्डलै साड्डे 9 बजे, 30एं मिटें दा इक विशेष कार्यक्रम प्रसारत कीता जाह्ग जेह्दे च क्षेत्रीय समाचार एकांश दी भूमिका, जिम्मेवारिएं ते कम्म करने दे तौर-तरीकें दे अलावा, इत्थे कम्म करी चुके दे अधिकारिएं कन्नै गल्लबात बी शामिल होग। अपने कर्मिएं दी हौसला-अफजाई लेई, ऐकती स्थापना दिवस दे मौके पर उनें'गी सम्मानित बी कीता जाह्ग जि'दे च 2024 ब'रे दे बेह्तरीन समाचार सम्पादक, डोगरी ते गोजरी दे बेह्तरीन समाचार वाचक ते अनुवादक, बेह्तरीन जिला संवाददाता ते जनरल स्टाफ श्रेणी च बेह्तरीन कर्मि दे सम्मान शामिल न। इस मौके पर 2024 आले लोकसभा ते विधानसभा चुनाएं दरान आकाशवाणी दे विशेष कार्यक्रमें लेई सैद्योग ते जोगदान देने आहलें गी बी सम्मानित कीता जाह्ग।

